

山陽志
遺

邱鴻芳書端



壬戌十月
淮安志局刊

山陽志遺者何志山陽之遺事也山陽故無志曷遺郡志首
志山陽事未賅予山陽人心嘆之故專志其遺也郡志近始
修又曷遺尙簡故邊幅懼溢也有期故擴摭不廣也任分故
甲有獲乙不備聞也不獨遺抑有誤誤則辨雖辨亦誤概以
爲遺也不獨舊志誤或改焉不誤者翻致誤也辨不及私存
其舊雖存舊亦猶之乎遺也予之竊竊于此始此乎前此矣
得一事謹識之得一書謹藏之將有待也待志之修也待修
志者來舉以告也今志已修又身與其事卒不獲盡用其說
且日見其誤之增于舊而不能救也則大懼懼獲罪于後世
人不我諒也懼歲月之易逝聞見就湮也不得已爲志遺不
立例繁簡勿計也不刻期鉤稽可詳也補其缺非務多也正
其誤非好訐也其所不知仍闕如也約爲四端不敢襲志體

山陽志遺

序

一

私撰非官書也知之者或以爲舊志之外編不知者亦可視
爲一方之說鈴也吳玉搢纂

山陽志遺

遺跡卷一

淮安山陽 吳玉搢 山夫 撰



左傳哀九年吳城邗溝通江淮杜註于邗江築城穿溝東北通射陽湖西北至末口入淮禹貢雖指云山陽縣北五里之北辰堰他書亦作北神卽古末口也舊郡志云吳王城邗溝出于末口卽新城北辰坊之北閘也又云北閘在新城北洪武十年建今廢爲水關接末口卽北閘北閘卽新城之北水關去郡城五里而近此自春秋以後由江達淮之故道修志時錫山顧震滄先生名棟高著沿革一卷初亦主末口在淮安城北五里之說不知誰何忽改爲五十里云末口卽今運河由天妃閘出洪澤湖處安得但云五里震滄先生非淮人不能與深辨出示予予詫曰不然今運河乃明

山陽志遺

卷一

一

永樂中平江伯陳瑄所開其通湖處本名鴨陳口元凱安得豫知因徧檢諸書以指末口所在然後復改從原本又新編山陽縣志以末口卽喻口見叢說亦誤喻口鹽城縣地在射陽湖之東北湖水由此入海末口在射陽湖之西北乃湖水通淮處相去幾二百里益遠不相涉矣

淮陰縣舊有韓侯母墓太史公所云行營高敞地令其傍可置萬家者今無遺跡可考韓侯自鐘室被難之後不知窀穸何所今山西靈石縣有韓侯嶺嶺上有墓墓前有碑康熙庚午王學士頊齡典陝西試經墓下詩云曾從淮市瞻遺廟又向汾山拜古邱伏袴不妨容惡少比肩偏是恥樊侯藏弓烹狗誠何恨食鄴封留亦已休惟有墓前三尺碣冷風淒雨自千秋又淮安崔國屏遊西安聞城東七八里

有韓侯墓甚大親往拜之歸以告人言甚詳是又一墓矣
明萬歷中于甘羅城掘得古錢二穴以鑄關壯繆像今在高
加堰錢猶及見其一長寸餘形如風鐘有孔有篆歷歲久
丹翠斑駁可觀俗呼爲甘羅錢朱竹垞曝書亭集載所見
甘羅錢薄而小文止一字不可辨識下穿一小孔如鷺眼
縱環榆莢荇葉之類按甘羅城卽古淮陰縣地掘得二穴
錢不知其名後人就掘地名之非甘羅自鑄錢如鄧通沈
充比也至其形模各異或當時掘地所得有二種歟抑竹
垞別有所見也

史記以淮北沛陳汝南爲西楚彭城以東東海吳廣陵爲東
楚衡山九江江南豫章長沙爲南楚是爲三楚方密之通
雅云西楚南楚皆非宋之楚州東楚今蘇州西楚今徐州

山陽志遺

卷一

二

南楚卽今荊州府按晉書文苑傳伏滔正淮篇云淮南者
三代揚州之分秦并天下建立郡縣是爲九江淮陰在秦
屬九江郡九江屬南楚則淮陰亦當爲南楚地特未專名
楚州耳隋開皇初廢山陽郡十二年置楚州然後唐宋因
之不改先是北魏時置楚州治鍾離城楚州之名已見于
史然非此地之楚州又置西楚州領仵城城陽二郡亦非
其地

郡志陵墓卷內本不載楚元王墓叢說內一條云楚元王名
交其墓在城東北近河俗稱爲高嶺淮安土音以交爲高
也按項羽王楚其地兼有淮之南北韓王孫滅楚而自爲
楚王亦據有其舊境及降封淮陰侯漢取楚地分而爲二
以在淮北者封元王交以在淮南者封荆王賈荆絕改封

吳王濞元王所封爲東海薛郡彭城

都彭城

三十六縣是時

淮陰不在所封境內死安得葬此況後漢書郡國志彭城郡彭城縣下註云城西二十里有山山下有楚元王墓又文選有傳季友爲宋公修楚元王墓教註云在彭城宋公過見故修之元王墓所在之地歷有明據豈得以交之一字遂傳會在此淮人又傳射陽湖濱有楚王墳諺云射陽九里一千墩不知誰是楚王墳卽一地所傳已有異說尙何足信今郡城有楚元王廟自宋以來有之不知創始何人或亦流傳者之誤耶

元王之楚旣不得過淮凡元王之臣均與淮地無涉郡志載穆生于職官載申公于流寓遺白生不載按三人皆嘗仕元王爲中大夫旣而穆生去申公白生留卽云淮安所屬

山陽志遺

卷一

三

舊有東海下邳諸處在當日原爲楚地則三人亦應同列職官何所分別而殊異若此明人撰山陽古跡者有穆生遺館一題不知中大夫親近之臣縱有遺館豈得遠在境外緣此地前後皆嘗名楚而不審時代疆域分合之蹟故一往多誤至此耳

史記淮陰侯傳載信嘗垂釣古淮陰城下水經註淮水東逕淮陰縣三十里昔信去下鄉而釣於此南畿志淮陰故城去治西北四十里韓信釣于城下卽此今縣廢城亦久圯侯舊遊歷處如淮陰市跨下橋及韓母漂母塚俱湮于水略無遺跡可指今郡城北門外漕河隄堦有韓侯釣臺在漂母祠前乃明萬歷間郡守劉公大文所追建而唐宋人過淮陰皆無咏釣臺詩卽吾鄉諸先達明成弘以前人集

中無此題也有之自潘中丞始可以考見創建歲月矣
城西北三里湖嘴俗稱枚皋故里按史記乘在梁取皋母爲
小妻乘東歸皋母不肯隨分皋數千錢留與皋母居皋年
十七事梁孝王及至長安武帝知爲乘子善之拜爲郎皋
雖乘子幼實未嘗居淮陰所有故里當屬乘不當屬皋乘
有故里宜在古淮陰不在今山陽徒以趙承祐有家在枚
皋舊宅邊之句好古者遂取以名其里實則詩人寄興之
詞不必定有所據也南畿志枚皋宅在淮陰縣南三百步
漢有兩山陽一山陽郡今山東兗州府地景帝中六年分梁
孝王子定別爲山陽國武帝建元五年置山陽郡一山陽
縣屬河內郡今河南懷慶府地以太行山在其西北得名
漢獻帝延康元年曹丕奉帝爲山陽公卽此地俱與今淮
山陽志遺

卷一

四

安之山陽無涉此地舊爲淮陰射陽二縣晉安帝義熙中
始置山陽郡縣亦同時並立自晉以前不名山陽雖有山

陽池

三國志
蔣濟傳

山陽津

戴延之
西征記

山陽渡等名皆未嘗以名郡

縣則凡封建人物之稱山陽者皆非此地也又通典謂吳
王濞反山陽王率眾於此拒之故名按漢有兩山陽王一
元帝之子名康與吳楚絕不相及一梁孝王之子名定景
帝中六年立爲山陽王亦後于吳楚反時十年吳楚反以
兵捍之者梁孝王也孝王在諸子固未嘗封王且吳起兵
廣陵西涉淮并將楚兵破梁于棘壁未聞有人拒之于射
陽者年與地俱不合通典亦誤

郡志公路浦卽淮口清江浦引寰宇記袁術向九江將奔袁
譚路出斯浦按水經注淮陰縣城西二里有公路浦昔袁

術自九江東奔袁譚路出茲浦而得名酈所謂淮陰縣卽
今清口之甘羅城甘羅城卽淮陰故城其說見節孝先生集今清江浦在甘羅
城東二十里其非城西二里之公路浦明矣又伏滔北征
記曰廣陵西一里水名公路浦昔袁術自九江東奔袁譚
于下邳由此浦渡因名魏晉時廣陵太守治所實在淮陰
縣伏滔所云廣陵西一里卽道元所云淮陰西二里也術
從此向下邳其不東出今清江浦無疑矣

吾淮在漢魏時東南有射陽縣西北有淮陰縣由淮陰以至
射陽中間相距約百餘里無城郭井市有大澤名山陽池
又名精湖三國志蔣濟傳魏文帝伐吳還懼戰艦爲吳所
得欲燒船于山陽池蔣濟盡驅船入池又別開地四五道
使船入淮帝嘉其功一池之中可容戰艦數千又別鑿地

山陽志遺

卷一

五

四五道其寬廣可知山陽池正當在今郡城左右縣北末
口本通淮故道戰艦出淮一口不足故須別鑿池舊容戰
船數千又別鑿四五道水益廣波濤沮洳固無地可建城
郭東晉末安帝義熙中見宋史李乃于此建立郡縣晉穆
帝永和中荀羨除北中郎將徐州刺史監徐兗二州諸軍
事羨至鎮發二州兵北鎮淮陰屯田于東陽之石鼈將帥
師北討其表略云淮陰舊鎮地形都要水陸交通易以觀
釁沃野有開植之利方舟運漕無地屯兵乃營立城池焉
蓋至此瀦水漸殺爽塏漸露相度地勢遠可以聯絡淮陰
射陽近可以控扼末口經營久之故郡縣並建也其以山
陽名者當是以故水名爲郡縣名如鉅野縣之因鉅野澤
雲夢縣之因雲夢澤存其舊以志不忘耳

三國志吳孫韶爲廣陵太守徙徐泗江淮之地不居者各數
百里通典廣陵初屬魏爲重鎮後屬吳孫亮建興三年城
廣陵宋書地理志射陽鹽漬江都海陵高郵等縣三國時
俱廢又云三國時江淮爲戰爭之地其間不居者各數百
里淮南虛其地無復民戶吳平民各還本土故復立又三
國志蔣濟傳建安十四年太祖欲徙淮南民濟曰百姓懷
土懼必不安不聽民轉相驚恐江淮間十餘萬眾盡走入
吳地遂空由是觀之三國時吾郡城郭未建且數十年無
居人其荒寂可勝嘆哉宋末遭李全之亂城郭僅存居人
流散荒寂又復如是吾郡何辜罹此屢劫詩人所爲賦式
微也然自明初迄今享太平者數百年矣

去新城東門十里許古淮隄上有劉伶臺前有祠後有墓祠

山陽志遺

卷一

六

祀劉伶而以杜康配焉隄南數里又有杜康橋按晉書伶
沛國人名列竹林生卒皆不聞在淮不知此地何緣有墓
有祠意竹林諸子蹤跡多半河內山陽後人因此地縣名
偶同慕醉鄉之高風因而援致之也至伶與康時地迥異
而配食一堂殆卽以酒作之合與唐許渾淮陰阻風詩已
有劉伶臺下稻花晚之句則由來舊矣光州志載劉伶臺
天下凡十有三處浙江嘉興府志亦有劉伶臺俗呼金伶
墓蓋避吳越王諱鏐與劉同音也鄉先輩阮鶴緱先生晉
有劉伶臺記

洪澤本地名齊書有洪澤澗在淮陰鎮之西一說隋煬帝至
破釜澗而雨遂易名洪澤澗唐皇甫冉洪澤館詩底事洪
澤壁空留黃絹辭年年淮水上行客不勝悲歐陽公于役

志云六月丁巳次洪澤洪澤巡檢顏懷玉蘇東坡有發洪澤中途遇風復還洪澤詩蓋淮陰縣西一邨鎮名初名破釜繼名洪澤民居驛館官舍市肆凡泛淮從盱泗而下者此爲一頓宿處也始但有澗後漸成湖本在淮水東岸之東不與淮通且亦狹小西爲淮河東爲陳公塘卽高塘中爲洪澤鎮其北尙有富陵泥墩諸湖由盱眙至淮不過二百里淮隄之東除邨鎮田疇外諸湖大者不過三四十里自黃水奪淮入海以兩大水並行一渠黃強淮弱淮水急不得下日漸騰涌致使歷代黃水從上流入淮出清口之路泥沙填淤陳公塘以西之諸湖及淮墊高數丈洪澤高陵泥墩諸湖並淮河混合爲一無復隄堰間隔而泗州且沈水底此後概以洪澤湖名之矣其先土人猶相傳有洪澤

山陽志遺

卷一

七

邨之名莫之見也康熙辛巳五月二十日未刻守汛高良澗上者見西南風驟起甚雨隨之湖波山立申刻雨霽風止虹見于東返照射湖鬚眉俱見有若帆檣數百艘環水如城亘十餘里土人曰此非洪澤邨耶頃歲尙有民居五十家以水避去水漫其上者二尺茲水落而邨出耳踰年河防使者張公命汛員刺舟往探還言東西街道舊有千餘家康熙初尙有百家十五年水漲遂被湮沒今邨基止沙灘一線高尺餘長七十餘丈濶八九丈不等雨後所見正此今不復再有見者子嘗泛長淮東下舟子語予水澗時至洪澤鎮地尙可泊舟其水較他處少淺茫茫巨浸中長年能識其處

淮陰在劉宋時曾名兗州彼時南兗北兗兗之名紛然雜見

志地者茫無依據郡志沿革全不分明今略爲考定之宋書地理志明帝泰始三年張永敗于呂梁遂失淮北青冀徐兗四州于是以鍾離置徐州以淮陰爲北兗州兗本在淮陰之北僑立兗州于淮陰當名南而此反稱北何也按晉自南渡後北方疆土盡失成帝時立南兗州寄治京口宋文帝元嘉中徙治盱眙三十年省南兗州併入南徐後復立還治廣陵自宋以來青冀等州暫歸于南至是復失旣以廣陵爲南兗故遂以淮陰爲北兗也然亦有時單稱兗如南齊書高帝紀云以帝鎮淮陰尋遷督南兗徐二州諸軍事五年進督兗青冀三州上稱南兗此單稱兗者知是淮陰之北兗州此時兗州本境未復也

宋明帝泰始中旣于淮陰置北兗州矣至齊武帝永明七年

山陽志遺

卷一

八

呂安國啟稱北兗州雖創置淮陰而陽平一郡州無實土寄山陽境內東平爲衣冠所繫乞于山陽盱眙二界間割小戶置此郡使本壤族姓有所依歸于是更立陽平郡寄治山陽領泰清永陽安宜豐國四縣立東平郡領壽張淮安二縣割山陽官瀆以西三百戶置壽張縣割直瀆破釜以東淮陰鎮下流雜一百戶置淮安縣淮安之名始見于史其地約在今山陽之西與盱眙相近之處雖在今淮安府境內然疆土極小又不久輒廢此地仍稱淮陰山陽不稱淮安也直至宋理宗寶慶三年以楚州疊遭兵燹略無寧歲乃改楚州爲淮安軍非襲蕭齊舊名特祈淮地安定耳自此以後元稱淮安路明稱淮安府 國朝因之至隋于淮蔡桐柏等處立淮安郡西魏時立淮州隋復改桐柏

縣爲淮安縣唐泌州有淮安縣

淮安王神初治棗陽繼徙通封于此

治泌陽皆與吾郡之淮安無涉又漢以陳州爲淮陽國隋

以陳州爲淮陽郡宋以下邳爲淮陽軍皆非吾郡惟淮陰淮陽山陽三名易混考古者援引不清一往淆亂如郡志列楊士林入人物志此誤之一證也按史云楊士林淮安人隋末朱粲剽掠漢淮間士林起兵攻之旁郡響應粲大敗士林率漢東四郡降唐高祖以爲顯州道行臺隋書地理志開皇五年改淮安郡爲顯州士林淮安人而爲顯州行臺蓋卽以其本郡封之此隋之淮安郡人吾郡此時不特無淮安之名且並無淮稱其載士林何也

淮陰縣立于秦見史記淮陰侯傳註乃魏書地理志有山陽郡治山陽城有淮陰郡治懷恩縣又有城陽郡領淮陰縣山陽志遺卷一

九

件城郡亦領淮陰縣重複糾擾使讀者茫無頭緒細考城陽郡屬豫州件城郡屬西楚州皆隋時僑立不久卽廢均非吾郡之淮陰也

宋書地理志山陽太守領縣四山陽鹽城東城左鄉山陽之名本改于晉安帝義熙中乃晉志不見僅見于宋志者時晉祚將移劉裕專制雖晉改實宋改故宋志反詳而晉志反略也至晉志所云安帝分廣陵之建陵臨江如臯海甯蒲濤五縣置山陽郡此山陽字當作海陵乃晉志誤書沿訛未及改正耳潛邱劄記辨之甚明宋書現並列海陵太守領縣六卽廣陵等六縣山陽太守領縣四卽山陽等四縣何得又以廣陵等六縣爲山陽郡乎海陵今泰州山陽今淮安當以宋志爲正

楊升菴集載劉季裴曰自古守淮莫難于謝玄又莫難于楊行密玄以八千人當符堅九十萬之眾清口之役行密以三萬人當朱全忠八州之師而卒以勝者扼淮以拒敵而不延敵以入淮也按清口卽今河口正淮郡之門戶謝之守淮在壽春非吾淮地也

城東角紫霄宮前有高阜相傳爲程徽金墳

一稱徽金塚舊志載

宋紹興十年韓蘄王築城掘地深丈許見一棺得埋銘云唐程知節墓又云遇韓則破按唐書徽金後名知節東阿人爲峻州刺史卒贈益州大都督陪葬昭陵不得有墳在楚州然三十年前予姊家楊氏住東門水巷口因治屋掘地得小石碑長尺餘濶五六寸中有字一行今不盡記憶旁一行有臣程知節奉勅監造字行筆頗類歐柳此予所

山陽志遺

卷一

十

目睹者疑知節常有事莅淮不詳于史無從根證或此地爲其登眺之處墩墳聲近久而沿譌遂爲韓蘄王之說以實之耶

淮安枸杞井在城內開元寺寺在城西南隅天妃宮之側宮頽敗已極枸杞無存止智井一區而已唐人劉禹錫飲此水而甘之留詩于寺云僧房藥樹依寒井井有清泉樹有靈翠黛葉生籠石螿殷紅子熟照銅餅枝繁本是仙人杖根老今成瑞犬形上品功能甘露味還知一勺可延齡舊志錄此詩刪去四句不知何故又白香山集有贈楚州郭使君詩後一首和郭使君題枸杞詩云山陽太守政嚴明吏靜人安無犬驚不知靈藥根成狗怪得時聞吠夜聲此亦咏開元寺之枸杞也別本白集山陽二字或作淮陰非

又李東垣本草註淮陰有枸杞井在城內開元寺水味甘補臟明耳目止腰膝癱痛固精氣聖泉也

周世宗顯德五年伐南唐欲引戰艦自淮入江艦大阻北辰堰不得過鑿楚州西老鶴河以通道民夫浚之旬日功成巨艦數百艘皆循淮而下舊志古蹟中有老鶴河云去治西七十里今塞有遺蹟明代尙或可考今不知其處張太史山陽志云今河北有老鶴亭或其遺蹟然老鶴亭在河北老鶴河在城西亦遠不相涉然則舊志城西七十里之說不知何所據而云又不得憑臆斷其不七十里惟考宋嘉定中安撫應純之申本州文有自管家湖與老鶴河接岸處之語管家湖亦在城西北卽古所謂西湖旣與老鶴河接岸則老鶴河去城不遠可斷其不得至七十里也其

山陽志遺

卷一

上

通淮處當卽在武家墩高良澗左右而尾閘則下達諸湖故云去郡治六七十里耳千年遺跡猶可以形勢揣得之歐陽公于役志載景祐三年丙子歲六月丁巳次洪澤明日食畢解舟以前晚入沙河乘月夜行向山陽二鼓宿闌下黎明至楚州泊舟西倉會飲于倉亭出倉北門看雨庚申小飲舟中艤舟城西門門閉泛月以歸辛酉弈于倉亭壬戌小飲倉北門舟中夜宿倉亭癸亥夕坐水次納涼已而大風雨震雹暴至乙丑小飲水陸院東亭看雨丙寅飲于西倉丁卯登倉北堰上亭納涼己巳泛舟北辰宿倉亭辛未夜飲倉亭壬申泛舟於北辰癸酉小飲倉亭甲戌小飲魏公亭看荷花晚移舟楚望亭自泊舟西倉及移楚望在淮者凡一十七日當時所謂西倉倉亭堰上亭魏公亭楚

望亭者皆不過在郡城內外今遺跡皆不可考惟北辰知爲今新城之北辰坊水陸院尙在今北門內

水經注淮水一條下云昔吳將伐齊北霸中國自廣陵城東南築邗城城下掘深溝謂之韓江亦曰邗溟溝自江東北通射陽湖地里志所謂渠水也而北至末口淮接末口二字下當有入字觀杜元凱左傳哀十年註自見酈注當是脫誤不然末口淮三字于義難通又云山陽縣有中瀆水首受江干廣陵郡之江都縣自廣陵北出廣武湖東陸陽湖西二湖相去五里水出其間下注樊梁湖舊道東北出至博芝射陽二湖西北出夾邪乃至山陽矣按夾邪在射陽西北正在山陽境內但不知在今何處耳又云永和中患湖道多風陳敏因穿樊梁湖北口下注津湖逕渡渡十

二里方達北口直至夾邪興甯中復以津湖多風又自湖之南北口沿東岸二十里穿渠入北口自後行者不復由湖故蔣濟三州論曰淮湖紆遠水陸異路山陽不通陳穿溝更鑿馬瀨百里渡湖者也按所云永和興甯當是晉穆帝及哀帝年號未必爲東漢順帝之永和陳敏晉人在蔣濟之後此云陳穿溝未知所指又云自廣陵出山陽白馬湖逕山陽城西卽射陽縣之故城也應劭曰在射水之陽漢高祖六年封楚令尹項纏爲侯國也王莽更之曰監淮亭世祖建武十五年封子荆爲山陽公治此十七年爲王國此說誤城本北中郎將庾希所鎮中瀆又東爲山陽浦又東入淮謂之山陽口者也按射陽縣故城當在今山陽縣治東南數十里此云白馬湖逕山陽縣西卽射陽縣之

故城恐誤中瀆水今亦不知所在博芝津湖似皆未入山陽境內禹貢錐指以津湖爲在寶應庶幾近之

漢書功臣侯表載漢地節四年封長安男子張章爲博成侯注曰淮陰博成淮陰之鄉名也淮陰鄉名今無此稱不知表注何據想彼時楚州圖經地志尙全可考

郡城北門外舊有英烈王廟祀伍子胥唐盧恕有重修楚州吳太宰伍相神祠記載文苑英華舊志云唐狄仁傑巡撫江淮焚淫祠十七百所惟留太伯季札子胥三祠閻先生潛邱劄記云楚州淮陰郡唐隸淮南道非江南也武后垂拱四年狄仁傑爲江南道巡撫大使奏焚淫祠留有伍員廟廟自當在吳越間明一統志以城外英烈王廟卽是且改江南爲江淮殊非又常疑子胥何爲廟食楚州按盧記

山陽志遺

卷一

三

言楚州淮壩太宰伍相廟置在吳時臨邗溝當伐越時餽運所開太宰經畫及因讒而沒其神憑大波雄憤無所洩蓄爲猛飈駭眾吳人恐之故與立祠邗溝上歷代皆崇其祠椎牛醢酒小民有至破產者北齊清河王勵刺此州申教部民不宜荒瀆非神之意其風稍革國朝龍朔中爲狂人郭行眞所焚乾封初準勅重建大中十年滎陽鄭公守郡不著其名每雨少差期晴少失候公一至請之靈既立答舊廟葺隘淺迫前橫岸道塵坌玷褻公圖將顯大之俄有州人蔣容者啟公請合財葺之于是開其前伸其後重肖神像及儀從等據此文廟祀之來已久以吳開邗溝子胥寔經營之邗溝達淮故淮人亦崇祀之邗溝屬子胥所開事已絕無可考又以其憑大波發猛飈吳人恐懼故與立祠

則亦出于流俗傳會之詞不必實有是事也又按吳之溝
通江淮意在伐齊會晉爭霸中原耳若伐越則安事渡江
涉淮耶又按傳記子胥仕吳未嘗官太宰此文云云頗似
不通古者所爲又據此文北齊時楚州刺史有清河王勵
大中中有滎陽鄭某舊志皆無之盧恕未知何官其記末
云詔徵公爲諫議大夫釋符之日恕蒙公付以留務當亦
郡丞別駕之類耳舊志亦失載

郡有宴花樓俗傳卽郡城南門樓按舊志云宴花樓南唐建
又引趙承祐門外煙橫載酒船詩渭南集此詩本題云陪
韋中丞宴扈都頭花園題下注云一作楚州宴花樓宴花
樓之名但見于此韋中丞卽楚州刺史韋瓘扈都頭不知
何人疑卽扈都頭園中樓耳然旣見趙詩則唐會昌中已

山陽志遺

卷一

古

有何得云南唐始建耶今俗以南城樓當之此又不然按
文苑英華載鄭吉楚州修城南門記作于大中十四年其
略云楚大邦也日者草創南雖設譙門卑且陋但闔兩扉
爲露棚于前振軍旅焉露棚不能蔽風雨亟理而亟壞由
是刺史兼御史中丞李公新作之

李公名旬隴西成紀嶮人舊志秩官無之

然而樓增舊五之二焉劃爲雙門出者由左入者由右夾
築高阜類闕觀而非命之曰却敵慮墟土之易陂陀也鱗
暨而塗固之周施檻楯大中之末去會昌不二十年豈有
會昌中有樓屹然可以宴會而大中中卽止存露棚之理
卽或圯壞鄭記甯無一語及之此以知宴花樓之必不爲
南城樓也又記末云往歲有將作少監李姓陽冰名善籀
書尤工爲大字瑰碩多力郡邑省寺得其署題者榮而葆

之大歷中客遊楚因大署州門昔人指之于西偏至是公
易之于南門以表揭遠近陽冰字在當時已可寶重如此
不知毀于何時

汶河在治西南八十里古名柘塘有杭稻魚蟹之利環繞皆
水墟烟相望山陽諸村落中惟此地饒有勝趣此卽宋之
青州澗也宋嘗屯田于此以青州流移人墾之故名

唐書地理志常豐堰在山陽縣東南唐黜陟使李承建宋熙
寧九年劉瑾言楚州寶應縣唐宋寶應泥港射馬港山陽

縣渡塘溝龍興浦淮陰縣青州澗等處皆可興置欲令逐
路轉運使選官按覆從之凡諸遺跡今皆無考舊志不載
其名遂亦莫識其處惟青州澗知
爲今汶河鎮

白水塘志載其事甚詳今已不能確指其疆域所在然以地

山陽志遺 卷一

五

勢考之知在今郡治西南西抵盱眙南連寶應一帶皆是
潛邱先生因寶應縣志白水塘舊名白水陂一曰射陂遂
確指白水塘卽射水陂一統志以射陽湖卽射陂爲非按
射陂白水塘二名自漢魏及宋並著于山陽寶應之間自
宋以後其跡始湮蓋淮水漲高堰決三河六隄興郡西陂
堰絕無當時尺寸今白水塘已不可考又安知其爲射水
否耶

周橋之南有棠梨樹高不踰丈大不盈握枝幹蒼古有如鐵
樹地以此名問之士人莫知所始按唐書地理志棠梨涇
在淮陰縣南九十五里長慶二年開水經注淮陰城在今
甘羅城之西南古今水陸異路自淮陰至棠梨樹道里適
合而周橋以南有唐漕河當卽唐之棠梨涇涇涇而樹存